

Boccalini

Ausschnitte aus dem Programm 2011

Bir Wahl vom letschta Papscht lauft alles schön nach Plan.
Habemus papam rüaft ma bald im Vatikan.
Zweituusig zehh kunnt denn as Echo us dr Schwiz,
habemus mammas z'Bern und das grad mit 4 Sitz.

Mol weiss er's mol nit das isch a Schweinerei
I schlüss do ab und fang erscht spöter a das isch doch einerlei
Dä wo sich Sorga macht, so cool und mit viel speed,
Jo iahr sind richtig, es isch dr Möchtegernständerot Martin Schmid

Es regt sich gär nüt und der Neni kanns fascht nid verstoh,
ds'Nani frogt jo säg hesch du nit as Viagra gnoh.
Wohl klar do vo da klina tüüra Pölla bim Cheminé,
seit's Nani nei du Lappi das sind vum Merz dia tüüra Praliné

Wie lang jetzt d'Goofe müand im Kindersitzli hogga,
isch bschlossni Sach doch eine i der EU fangt a bokka.
- Är isch kei Goof meh, doch ds'Gsetz tuat ihn erreicha.
Dr'Sarkozy dä muass ins Sitzli, wäg de kurza Scheicha.

Dr öffentlich Verkehr dä isch a Bomba in dem Land.
Strukturiart und duratimt, in dr ganza Welt bekannt.
Nur z'Khur bim Stadtbuss kanns dr amol passiera,
dass diar as Rad entgega kunnt bim friedlicha flaniera.

D'Muselfraua, d'Muselmänner gönd uf d'Gass,
iahari Herrscher kriagand Schiss, das isch kei Spass.
Eina um dr ander springt mit viel Lärm drvoo,
Dr Lardi goht ganz still und lislig, do sind miar alli froh.

Sparand Sie und tüand uf Migros-Budget schwööra,
oder sich zum COOP Prix Garantie bekehrta?
Au dr Denner und dr Aldi tüand aim alles günschtig gäh –
Do könnt sich dr Bus vu Khur amool a Bispiel nää.

Ob Schneefall, Nebel, Räga, Sunna oder Föhn,
d'Skirennä z'Garmischsind doch eifach wunderschöön.
D'Südtiroler holand Medallia und werdand drbii no riich,
doch das isch üssna Schwyzerfahrer schissaglich.

Si wächsland d'Departement as isch a wahri Freud.
Das hür a Wahljoahr isch, das kümmarat dia kei Deut.
Nur eis do sind miar Boccalini würklich froh:
Das d'Sommaruga nit dr Coiffeur vor Schlumpf het übernoh.

Dr Euro macht am Rubel jo scho recht bald Konkurrenz,
Gürtel enger, tüüfer stapla isch denn d'Konsequenz.
D'Hotelbranche liidet drunter und as het kai Schnee,
Villicht hilft z'Landquart d'Ziegelei, dia hät doch sicher meh.

Das 1. Auguschtfür z' Chur das isch a Flop
Au an dr Fasnacht ghörsch a ganz a müads plop plop
Los Boner do d'Idee für nögscht Johr dass wärs doch au
A paar Frauafelderfürzli uf dr Obere Au